

RADIOSCOLA ROMONTSCH TEXTS COMPLESSIVS

EDIZIUN DELLA CUMINONZA RADIO ROMONTSCH / PUBLICAZIUN DELLA CUMISSIUN RADIOSCOLA

Redacziun: Alfons Maissen
Stampa Tagblatt Cuera

EMISSION 13. 10. 64, 14.30-15.00 h

Compara sis gadas, ils meins
d'october tochen mars Nr. 47

CHRISTIAN FANZUN, TARASP

Il liber signuradi da Tarasp e seis chastè

Lönch, lönch insü ed ingiò da nossa bella Engadina bassa salüdan ils mürs albs dal chastè da Tarasp chi s'adozan sün üna stipa collina ot, ot sur la riva da l'En. A seis pè giascha l'idillic cumünet da Tarasp culla baselgia parochiala, circundà da las differentas muntognas, ils vegls bains feudals chi fuormevan avant il liber signuradi da Tarasp. Ed immez as schlada il pitschen lajet da Tarasp aint il qual as resplendan ils mürs albs da la baselgia e dal chastè sco in ün spejel da cristall. El ais circundà da bella e früttaivla pradaria e champs, sco chi's chatta sün tuot il bel plan da Tarasp, da Vulpera fin ad Aschera. I nu po correspuonder, cha'l nom da Tarasp deriva da «Terra aspera»: seis bels gods e baintcultivats champs e pradaria cumprovan il cuntrari. Ma na be la terra contribuischa lapro il seis. Els as han svilupats e fuormats culla lavur, las fadias e la süjors da nos antenats chi la cultivettan i'l cuors da seculs cun üsaglias e mezs uschè primitivs, cun perseveranza e sforzs. Schi's considerescha e's recognuoscha tuot l'andamaint, schi sun noss meritis bain plü pitschens e meskins. No eschan pelvaira be ils ertavels dals sacrificizis da noss perdavants. Quels resplendan eir our da l'istorgia da Tarasp chi va uschè lönch inavo fin in temps antics. Scha vo laivat tadlar alch da quai istorgia, schi fain ün pitschen percuors tras ils seculs e millaisems passats. In ella ais cuntgnü il rebomb our da temps dürs e plain sacrificizis, ma listess bels. Il rebomb dal sainet dal chastè cha no dudiran davo less portar a noss antenats nossa recugnuschentscha e noss ingrazchamaints.

Tschert e franc, cha l'Engiadina bassa ed eir ils contuorns da Tarasp eiran colonisats lönch avant il temp roman, chi ans dà las prümas notizias in scrit. Suot il chastè da Tarasp, a Sgnè e sur Vulpera as rechattan ils prüms testimoni our da quel temp. I sun interessantischems megalits, o sco cha no dschain, las «plattas da las strias». Chi chi nun las ha amo vissas, sto far quai culla prüm'ocasiun. Que ais üna part d'ün grip plü grand, glisch e bain fuormà, e laint as rechattan da tuottas sorts segns misterius. Ma la granda part da quels sun fourinas raduondas

e chotenins, per part colliats tras strichs e sfessas. Amo hoz ingiün nun sa che cha quai avess da significhar, ed eir la scienza tschercha üna soluziun da quist'ingiavina. Noss antenats, bain pür millieras d'ans davo cha las plattas existivan, s'explichaivan quists fats cul dit, cha sün quistas plattas salvaivan las strias lur grands bals. Cun sun e sot, e'ls musicants sunaivan sün cuas d'giat, e cun lur peis sumgliants a peis d'chavra as fuormaivan alura quellas fourinas e stessas aint il crap, pustüt cur chi daivan alch pierlada scha gnivan disturbadas. Pür ils ultims ans han ils s-chavamaints sü Mottata sur Ramosch tras sar Nicolin Bischoff e seis collavuratuors e sü Rassonch sur Scuol tras sar Georg Peer cumprovà, cha eir l'Engiadina bassa eira colonisada fingia lönch avant il temp roman. Eir a Pilöt sper Tarasp, pac suot il chastè gnittan chattadas dal 1954 pro la fabrica da la chasa da sar Eduard Stecher las prümas fossas preistoricas in Engiadina. Tras quists interessantischems chats as sclerischan eir per part que cha tarabla e tradiziun ans quintan our da quels temps lontans e squasi invlidats.

Pür lönch davo cumparan alura ils Romans cun forza e potenza illa veglia Rezia. Sün lur avanzamaint vers la Germania sun els arrivats qua pür ca. 50 ans a. Cr. ma han acquistà la Rezia definitivmaing pür 15 ans d. Cr. Precis sco uossa als daivan ils problems stradals bier rumpacheu. Ma els eiran specialists per construcziuns da stradas e vias. Sco cha lur charta o register da las vias, la «tabula Peutingeriana» cumprova, passaiva la veglia strada da Zernez sur Clüs a Susch, da là a Lavin ed alura sur Gonda a Guarda, da Boscha sur Ardez our a Chanova e da là a Ftan ed inavant. A Chanova eira üna granda suosta. Da là davent manaiva alura plü tard ün bratsch giò Ardez e nan a Tarasp e da quà davent tras la Val S-charl sur il pass da Cruschetta vi'l Vnuost, bainquant avant cha'l Fuorn gniss fat transibel. Forsa cha eir las minieras in S-charl han promovü quist trajet. Da Tarasp davent manaiva üna punt sur la Clemgia chi gniva nomnada «pons apud la Frana». La «frana» es italian e vuol dir la bouda. Sainza dubi eira que üna punt suot Avrona, e füss quist il prüm nom existent our da l'odiern territori da Tarasp. Tenor la tradiziun as rechattaiva sülla collina dal chastè ün'uscheditta «specula», üna tuor per observar ils contuorns, ed in vicinanza da la baselgia da Tarasp, «sper la funtana», üna taverna. In tuots cas sarà stat là sülla planüra da Quadra

eir ün chomp militar, perche güst in quel lö vegnan adüna chattadas munaidas romanas. Ün fich bel exemplar d'or gnir chattà eir pro s-chavamaints sül chastè.

Ils Romans sun alura gnüts ed its, ma ant cha'l nom da *Tarasp* cumpara passan amo ans ed annorums. Sco üna staila splendurainta cumpara la schlatta dals signuors da Tarasp aint ill'istorgia retica. Misterius ais lur origen, ed in möd amo plü misterius sun els svanits fingià gnanca 200 ans plü tard. Las prümas menziuns istoricas in scrit chattaina amo bler plü tard, schabain chi ais avant man documainta dals signuors da Tarasp blerun plü bod. Aint il archiv da la clostra Maria da Munt, eir üna fundaziun dals signuors da Tarasp, as rechatta la copcha d'ün documaint scrit als 25 marz dal 1160 da Duri III. da Tarasp, e dal 1163 as chatta ün oter documaint da las sours Irmgard e Heilwig e Duri IV. e sia duonna Uta. Ma fingià dal 1089 fin l'an 1096 eira stat Duri II. da Tarasp ovais-ch da Cuaira. El eira gnü elet dal 1079. Ma da tuottas sorts intrigas, pustüt dal rai Heinrich, impossibilitettan ad el da surtour la diöcesa da Cuaira fin l'an 1089. El eira stat scolar a Mustér e gnit elet dal 1068 abat da Muri e l'istess an prevost da la catedrala da Cuaira. Ma las prümas notizchas in scrit quant a Tarasp e seis fundatuors as chatta pür aint ill'interessantischma cronica dal priur *Goswin* da la clostra da Maria da Munt dal 1374. El cumainza seis preambul culla notizcha «fabulose dicitur», sco cha la tradiziun ans disch. Tenor Goswin eira Duri I., il fundatur da Tarasp, ün nöbel Milanais chi eira stat bandi da seis pajais e gnü alura in Engadina bassa, ingio ch'el gnit svelt darcheu a grand possess. Da Ftan davent, ingio ch'el as avaiva chasà saja'l segui a la scossa da sia bescha sur l'En nan ed arrivà sün üna stupenta collina ch'el chattet adattada per eriger ün chastè. Que dvantet alura intuorn l'an 1040. Be 4 generaziuns sun amo seguidas a Duri I. Ün da seis quatter figls dvantet ovais-ch da Cuaira sco Ulrich II. e l'oter, Eberhard fundet la clostra da Scuol intuorn l'an 1078. Quella gnit benedida quel an dal cardinal Gregor. Ün abiadi da seis terz figl Gebezzo, Duri IV. laschet reconstruir la clostra da Scuol, per consequenza d'üna sajetta. El pisseret cha paders benedictins dad Ottobeuren surpiglian la clostra ed eir cha quella survegna ün abat, Albert I. El ais stat il prüm e l'ultim abat da Scuol, perche el stuvet svelt constatar, cha que eira impossibel da mantgnair in quist lö solitari e suot talas cundiziuns üna clostra. Eir para cha l'opposiziun dal pövel haja alura dat andit, cha Duri il fundatur e l'abat Albert sun its a Roma e han survgni il permiss dal papa Eugen III. l'an 1146 da pudair translocar la clostra in ün «meglder clima». Previs eira Sant Steivan sur Barbusch e Damal. Ma svelt han els alura translocà la clostra amo üna jada ün pèr 100 meters vers mezzanot, ingio ch'ella as rechatta amo hoz, a Maria da Munt sur Barbusch. Tant Duri IV. sco eir seis figl Duri V. entrettan sco muongs in quista clostra e murittan

tuots duos dal 1177, il figl in favrer ed il bap in december. Duri V. ais stat l'ultim da quista schlatta, siand cha seis cusdrin Gebezzo III. chi eira proprietari dal chastè e'l signuradi eira mort sainza descendenza fingià l'an 1173. Chastè e signuradi avettan alura il temp davo differents possessuors, fin ch'els rivettan finalmaing in mans dals signuors da Matsch, paraints culs signuors da Tarasp. In quists mans restet Tarasp fin l'an 1464, cur cha Duri IX. da Matsch vendet signuradi e chastè al duca Sigismund dal Tirol. Tanteraint avaiavan els eir laschè Tarasp sco pegn a Friedrich da Toggenburg il quindà da Duri VI. da Matsch chi murit dal 1436 eir sco ultim da sa schlatta. Suot el avaiava cumanzà dal 1399 la dispitta tanter Scuol e Tarasp pervia dad as-ch e pas-ch, gods ed alps. La cuntaisa ha dürà fin als 31 december 1904, dimena 505 ans. Duri IX. da Matsch avaiava acquistà dal 1471 eir las 6 Drettüras dal Partens. Da quel ans quinta nos cumpatriot, il cronist e refuormatur Duri Champell üna fich interessanta episodica. Cur cha Duri IX. faiva visita a seis possess our il Partens gniva'l a pè davent da seis ferm chastè da Churburg suot Damal obain sur Schlingia o sur la Cruschetta in ün di fin Susch, ingio cha'l staiva sur not. La saira giovaiva'l lura amo a boccia culs giuvens da Susch e faiva luottas, per cuntinuar il di davo seis viadi eir a pè fin in seis chastè da Castels. El dschaiva ch'el as turp chess bain dad ir quist pitschen toc a chavagl, cuntut cha'l avarà gnü cavallaria avuonda.

Cun l'acquist da Tarasp tras il duca Sigismund perdet quel tuott'importanza e gnit degradà ad üna simpla caserma e fortezza. Laint gniva adüna tgnü ün pitschna guarnischun chi gniva augmantada in temps da guerra. L'administratur dal signuradi, il «Pfleger» eira eir chapitani dal chastè. Dürant il 16—18avel secul ha Tarasp alura fat tras da tuottas sorts, plü trid co bel, pustüt dürant la refuorma ed il temp dals scumpigls grischuns. Davo cha l'Engiadina bassa as avaiava cumprada libra al 1652 perdet eir l'archiduca tuot interess vi da Tarasp. Perque cedet el dal 1686 signuradi a chastè als prinzi da Dietrichstein a Nicolsburg in Marovia. Bler nun ha quel gurbì cun quista cumpra, ma almain il dret da sezzer e vuschar aint il «Fürstenrat». Ils prüms chapitanis chi eiran sül chastè dal temp da Dietrichstein eiran da Tarasp: Giargöra e Jachen Pazeller, e davo Antoni Ors da Müstair e Chasper de Luci.

La revoluziun francesa e Napioliun han alura miss suot-sura mez il muond, ed il Grischun ha pers in quist'ocasiun la bella Vuclina. Pajais e naziuns sun gnüts partits sü tanter ils pussants, e cul territori da la Confederaziun hana fat la Republica elvetica. In quist'ocasiun ais eir Tarasp gnü incorporà a quella. Fingià l'utuon dal 1802 ha il congress da Regensburg decis cha Tarasp gniss miss pro la Republica elvetica, ed als 21 favrer 1803 ais gnü effetuà quista decisiun. Tarasp avaiava tenor quella da fuormar ün agen circul, gnit però collià cul

circul da Sur Tasna e d'vantet parsnavel da tuots drets e dovairs sco tschels concircuitals. Ils bain dal chastè e quel s'vess sun eir its in possess dal chantun Grischun. Quel nu savaiva bler che cumanzar cun tuot. Amo alch ans gnit il chastè abità da tschertas famiglias ambulantas. Dal 1824 avaiava fat a Cuoir la proposta d'eriger aint il chastè da Tarasp la praschun o chasa da correcziun chantunala. Il Grand Cussagl ha lönch discutà la chosa. Ün ourd'vart furber deputà manajaiva chi nu's possa bain pretendere cha'ls delinquents gnian in conflict o contact culs da Tarasp. Il Grand Cussagl ha respint la proposta e decis da scriver oura l'inchant dal chastè e dals bains, que chi seguit eir. Il bel bain gnit inchantà per 12 000 rentschs dal vegl fittadin Jon Federspiel, o'l «mèr vegl», sco chi'l nomnevan. Pel chastè s'vess nun s'annunzchet ingün cumprader. In quist'ocasiun ha ml. Clot Carl cumprà l'uter e'l sainet dal chastè pella baselgetta previsa a Vulpera, la quala gnit alura fabrichada dal 1827—28. Dal 1827 decidet il Grand Cussagl da vender eir il chastè uschè bain sco pussibel. Sülla publicaziun aint illa Gazetta da Cuoir dals 13 lügl 1827 as annunzchet be ün cumprader, ml. Men Marchi da Scuol. Davo lungas trattativas gnit alura finalmaintg il chastè vendü a quel per 250 rentschs o 450 francs. Alura ais il chastè gnü spoglià fin als ultims e vendü darcheu dal 1840 a sar Giargöra Pazeller da Tarasp. Da quel l'ha alura iertà seis cugnà Chasper de St. Jon. Quel il vendet dal 1857 a dr. Christian v. Moos sco incombenza da seis ami cusglier naziunal Andrea Rudolf de Planta da Samedan per 1000 fr. Quel ha bain provà da'l mantgnair, ma que eira ün problem bod impussibel. La fin da l'ultim tschientiner eira il chastè üna cumpletta ruina. Sul e trist guardaivan seis mürs decadents giò sül pajais, ün trist aspet. Tuot chi daiva buns cussagls per il conservar, ma ingüns raps. Quà, propi l'ultim mumaint, subentret ün fat dal tuot imprevis chi ha salvà il chastè da la cumpletta ruina.

In gün 1900 gniva in ün'eleganta charrozza ün modest ester sur il Flüela per far la cura da Tarasp. Davo ün terribel temporal chi'l tgnet sü lönch sül ospiz continuet el seis viadi. Il sulai splenduriva darcheu e suot la storta granda da Chantsura fermet il vegl postigliun e muosset a seis passager dalönts, dalöntschi giò pella val ils mürs albs dal chastè da Tarasp. Que fet üna grand'impreschiun a quel hom, sco ch'el quintaiva davo suvent e gugent. Apaina arrivà a seis hotel gnit el plü bod pussibel sü Tarasp a far üna visita al chastè ch'el avaiava vis uschè da lontan. Ma sia dischillusiun ais statta terribla. El nu chattet ün monumaint istoric degn dals perdavants, ma üna muschna d'crappa. Id eira directamaing privlus da passar sü per alch s-chala o tras ün corridor. Quista dumanda occupet a l'ester chi eira *Carl August Lingner* da Dresden, ün grand industrial, amo lönch di e not, fin ch'el as decidet da comprar quista povra ruina. Il contrat da cumpra cun signur colonel Rudolf de Planta pudet

gnir inscrit a Tarasp fingià la fin da settember 1900 per ün pedsch da cumpra da fr. 20 000.—. Lingner s'obliet in quel da mantgnair il chastè il meglder pussibel. Pür divers ans plü tard as decidet el da restorar il chastè. Ma üna renovaziun uschè granda sco ch'ell'ais gnüda fatta nun eira previsa. Bainbod gnit Lingner in üna vaira paschiun da far propi il meglder. Da tuottas varts gnittan cumpradas da las plü bellas stüvas e salas, cumpletas per gnir disfattas in lur lö d'origen e manadas a Tarasp e gnir missas darcheu insembel, meglder co avant. Eir mobiglia antica e da granda valur gnit cumprada insembel dapertuot intuorn. A la fin dal 1916 eira tuot a quel püt cha'l patrun pudaiva entrar in seis chastè davo ün temp da fabrica da bod 9 ans. Tuot ch'il spettaiva cun buonder, pustüt la nouva patruina ch'ingün nun avaiava amo vis ed ingün nu la cugnoschaiva. Pels 15 gün eira previsa la festa d'entrada. Ma als 5 da gün arriva il postin cun ün telegram. L'architect chi avaiava eir l'administraziun t'il riva e dvainta sblach sco la mort, dschand cun vusch tremblanta a seis collavuratuors: «Uossa esa tuot glivrà! Lingner es mort quista daman. Invezza da far il viadi tant bramà per pudair giodair ils früts da sias fadias e sacrificis ha'l fat quel lung, lung viadi cha tuot fa e sto far, e dal qual ingün nu tuorna.» La consternaziun e la participaziun eiran generalas.

Ma amo plü trist staiva uossa cul chastè chi eira apaina renovà e miss ad ir. Que paraiva bain curius, ma ingün nun il laiva, perche mantgnair ün chastè nun ais ingün divertimaint. Il rai da la Saxonia, al qual el eira testà nu l'acceptet. I's ha eir provà cul chantun Grischun. Ma quel nu laiva e nu pudaiva as confuonder cun simlas speculaziuns (per far la praschun chantunala füssa uossa listess stat puchà). Davo lungas trattativas l'hà l'ultim il granduca Ernst Ludwig da Hessen acceptà sco legat. A quista famiglia appartegna el amo uossa e vain mantgnü na be toccantamaing, ma bain cun grands sacrificis.

Quist ais cuortamaing l'istorgia da Tarasp e da seis chastè chi nu pon gnir tgnüts ourdglioter. Ella rinserra sulai e sumbriva, algrezcha e led. Chi sa che ha noss pardavants e'ls patrums dal chastè han tuot pati e cum battü per mantgnair nossa povra, ma bella patria. Na be ad els, ma eir a Lingner chi ha propi salvà il chastè, ed als nouv patrums laina hoz ed in avgnir savair grà ed ils tgnair in buna memoria.

Chars audituors! No avain vis che grand monumaint istoric e cultural chi ais gnü salvà tras *Carl August Lingner*. Ma il chastè da Tarasp, cun sia posiziun dominante, sia romantica e sias bellas e spaziusas localitats, seis orgel, quella jada ün dals grands e bels da la Svizra, cun 48 registers sonants e lapro passa 160 combinaziuns e registers auxiliars, cun si'amabla vox humana e vox angelica e passa 3 000 flötnas e posauinas pudess bainischem eir esser ün center cultural pell'Engadina bassa. L'orgel gnit construi dal maister *Jemlich* da Dresden l'an 1915/16

e füt collaudà quel an dal Pader *Leo Kunz*, organist da la clostra da Mustér e da l'organist da la catedrala da Fribourg. Siand cha'l motor pel fol gniva miss ad ir cun benzol chi nun eira bod gnanca dad obtgnair d'urant la guerra pudaiva quel gnir dovrà fich d'inrar. Ma tras sforzs da signur dr. Otto Töndury da l'hotel a Nairs pudet gnir organisà ün concert sül chasté als 25 da lügl dal 1917. L'organist dal dom da Türin il suneva. Tanter ils giasts d'onur eira eir nos ami e grand promotur dal rumantsch, cusgl. naz. Gion Rudolf Mohr, da quel temp a San Murezzan. Als 7 d'avuost da quel an pudet gnir salvà amo ün concert sün chasté. Prof. *Weber*, avant organist dal dom da St. *Steivan* a *Vienna* t'il sunaiva. Eir nos cunvaschin da Tarasp Josef *Federspiel* chi avaiva absolt il conservatori a Strassbourg salvet dal 1918 ün concert sül chasté; il program fich interessant ais amo avant mans.

Dal 1922 sunet Hermann *Suter*, il grand componist da Basilea e fidel giast da Tarasp, sia nouva immna naziunala ch'el avaiva cumponü a Tarasp sper l'aua da Plavna in preschentscha da var 6 amis e sia stimada consorta. Que d'eira ün mumaint edificant. Daspö quella jada ais l'orgel müt ed abandonà.

Eir differentas dietas e conferenzas gnittan occasiunalmang salvadas i'l chasté. Uschè salvet dal 1940 la gronda Società svizra per protecziun dals chastels (Burgenverein) sia radunanza annuala sül chasté, seguida d'ün pitschen banquet, offert da l'administraziun in ün'atmosfera la plü romantica e prüvada, sco cha'l president da la società, arch. *Probst* relevet in seis discurs final. Dal 1953 salvet la *Ladinia* sia radunanza annuala sün chasté, cun 2 referats. Dal 1959 manet tras la secziun grischuna da la Società svizra da stüdens üna dieta, e dal 1962 chattet lö dafatta üna nozza sün chasté e la prüma copulaziun aint illa chapella davo bod 200 ans. Quel an avet lö eir ün concert dal renomnà cumponist Bengiamin *Britten* e dal bariton Peter *Peers* aint illa sala granda davant alch invidats, ed eir Jehudi *Menuhin* ha dat qua ün bel concert in pitschna cumpagnia.

Ma il plü bel e'l plü intim ais listess stat ün pitschen concert improvisà da vaira taimpra rumantscha ed engiadinaisa. Que d'eira it uschè! Cur ch'eu d'eira amo in uffizi sün Engadin'ota scuntret eu ün bel di sü Zuoz a meis ami *Brunies*. No ans cugnoschaivan fingià da decennis ed eiran eir dvantats buns amis, eir scha no nu giaivan adüna daperüna cun nossas ideas e noss cheus dürs. *Brunies* am dschet ch'el haja previs ün «tourné» tras l'Engadina bassa cun «seis» musicants e ch'el gniss scha pussibel eir a Tarasp. «Naturalmaing cha Tü vainst», n'ha eu dit «ed alura giaina güst eir sün chasté pro nossa signuria chi ais cagiò in visita, e fain ün pa musica e «flott». El cugnoschaiva bain a noss patrün, cul qual el avaiva fat bleras turas aint il Parc naziunal avant bod 30 ans, ma ch'el nun avaiva vis plü davo. Il prüm

avaiva *Brunies* alch scrupels, ma alura ans avaina perinclets e cumbinats pels 13 d'avuost 1949 il davomezdi. Il prüm n'ha eu alura naturalmaing telefonà a meis ami *Men Rauch*, e l'ha banni per quel di sün chasté cun sa guitarra. El d'eira là bain cuntschaint e da chasa. La sanda davo n'ha eu pudü dir quista granda novità a meis patrüns, e quels d'eiran plü co cuntaints da gnir darcheu üna jada in buna ed allegra cumpagnia, perche els avaiavan fat tras da las bellas d'urant e specialmaing vers la fin da la guerra.

Quel di dimena, als 13 avuost, pudet eu partir pür intuorn las 11 da San Murezzan par arrivar a Scuol intuorn l'üna, ingio cha *Men* am avaiva da spettar cun ün auto e sa guitarra per gnir sü Tarasp a giantar. *Men* e la guitarra d'eiran là, ma ingün auto. Ch'el nun saja stat bun da chattar ün, ha'l dit. Quella jada nu cursaivan tantas postas, e no stuvaivan esser a Tarasp il plü tard a las 2, cur cha'ls musicants avaiavan dad arrivar. Quà arriva a la staziun ün bun cuntschaint cun ün auto resch nouv: sar cusgl. naz. *Georg Sprecher* chi d'eira via Sent in vacanzas. Quel as ha subit lubi da'ns manar sü Tarasp e fat que eir be subit. Per recumpensa t'il n'ha en alura invidà a quist concert improvisà, sco dals temps da pover *Walter von der Vogelweide* chi stuvaiva eir gnir a pè sü da *Puntina*. Il prüm nu vulaiva'l savair novas, ma davo explicchè ün pa la situaziun ha'l impromiss dad esser punctualmaing sül lö, que chi ais alura eir segui. Vers las 2 d.m. sun alura arrivats il musicants da *Brunies* cun lur instrumaints. Ma invezza da *Christian Sprecher* da Cuoir cun seis giun avaiva *Brunies* stuvü tour ün «suppleant», nos bun Not *Barblan* da *Vnà*. Pro el e *Brunies* d'eiran amo 3 signuors da Basilea cun trumbettas e gias, dimena ils veritabels «*Fränzlis*». Signur cusgl. naz. *Sprecher* eira intant eir arrivà, ed alura avaina festagià il revair pro mai bel e bain. Ma pover Not *Barblan* avaiva ün pa scrupels pervi da la principessa. Eu l'ha consolà plü bain pussibel e dit cha quai nun saja uschè mal, cha'la vegna bain in üna mantella da hermelin e cun sü üna coruna, ma cha quai nun fetscha nüglia, cha no sajan a la fin eir pro. Intuorn las 4 d.m. ans avaina alura miss uschè planet in via vers il chasté, ouravant *Men Rauch*, ed alura ils musicants da «*Brema*», nos giast *Sprecher* e mia famiglia. Sün chasté eschna stats accolts aint illa bella sala da mangiar e retschevüts cordialmaing. Nos Not *Barblan* ais lura stat perplex e plü co furtünà, cur ch'el ha vis cha la principessa d'eira plü simpla e modesta e sainza bellet ed unglas cotschnas sco bleras da nossas sfranzinellas. El ais stat eir tuot il temp tschantà sper ella, dschand a minch'ocasiun: «Quai es propi üna pulita persuna, e lura eir amo üna bella», riand suot oura. Planet ha *Steiven* cun seis musicants dat l'avertüra cun üna bella polca engiadinaisa, e sunà davo amo alch tocs.

Alura ha *Men* explicchè cuntgnü e sen da la chanzun rumantscha in text e melodia, chi dà per part expressiun

dal caracter da la populaziun muntagnarda e dal sentiment dal pövel in general, da seis far e pensar, da seis led e cordöli, dalet ed algrezcha El ha cumprovà e demuossà quai cun parts da veglias chanzuns reticas e melodias monotonas ed allegrias. Alura ha'l dat provas da chanzuns plü novas rumantschas, eir da sias aignas. Il plü bain ha plaschü quella da barba Peider, savaivat amo co cha'la va? . . .

Il temp ais passà uschè massa svelt. Il sulai d'eira per tramuntar e'l di s'inclinaiva. Tuot d'eira saldin e quiet, quai paraiva propi sco schi renaschessan ils bels temps remots cun lur chavaliers e bellas dunzellas vestidas in saida e valü. E'ls trubadurs nun avaivan neir mancà. Uossa, i'l crepuscul da la saira, ingrazzcha cusgl. naz. *Sprecher* in cuorts, ma resentits pleds pel giodimaint sport e la cordialità demussada, e conguala il bel davomezdi culs temps da la romantica medievals. Sainza far glüm eschna stats fin pro'l cumgià, cur cha tuot d'eira commoss da l'intimità e la cordialità demussada. Alura nos bun *Steivan* e seis musicants han amo sunà l'ultim toc per cumgià, bain sainza presümar cha quai es stat propi il cumgià per adüna. Pro'l far not eschna darcheu passats giò dals vegls cortils ed our da l'antic portun vers chasa. La mazzagluna cucuiva davo'l Pit *nair* oura, ed üna bella staila splendoriva survart sco ultim salüd. Giò per la via veglia, ingio cha tants buns e noschs cumpatriots saran passats i'l cuors dals seculs eschna darcheu arrivts pro mai. Davo üna cuorta tschaina ans avaina separats in amicizcha ed allegria, ma eir commoss e grats per la bainvuglientscha giodüda.

Il destin nun ans ha mai plü manats insembel a tuots. Il prüm ais gnüda la mort pro nos Not Barblan e l'ha tut be planet ed adascus l'archet our d'man, per adüna. Ün bel di ha amo strasunà cun tempamaint l'ultim tun our da la clarinetta da *Steivan Brunies* sur munts e vals, e pac plü tard, sco'na sajetta our dal tschêl serain, ais tschunca l'ultima corda da la guitarra da nos bun Men Rauch, chi

ais mort uschè dandet güst avant 6 ans. Ma no, a chi il destin ha regalà amo quists ans, ils lain tgnair a tuots in buna memoria, als ingrazchand pellas bellas uras passantadas insembel in prüvada cumpagnia.

Chars audituors! Uossa laina amo tadlar üna vusch chi dà testimonianza d'üna part da l'istorgia dal chastè da Tarasp, e chi ha vis a gnir ed ad ir generaziuns e fat tras bels e noschs temps: il sainen dal chastè, chi as rechatta daspö bod 140 ans giò la chapelletta da Vulpera. Quel ais stat culà probabelmaing a Bressanone suot il chapitani Johann Benedict *Tenaglia* dal 1738, sco chi'ins disch il millaisem lasura. Sco cha signur cusgl. naz. Tumasch de *Albertini* da La Punt ans dschet, sajan stats amo 2 sains sün chastè, ed eir ün'ura da clucher piazzada uschi gliò dad alch vart, ma chi staiva in connex culs sains. Tuot saja gnü regalà dal chantun Grischun pro l'incorporaziun da Tarasp a la Republica elvetica al commissari elvetic dal district Bernina, junker Jachen Constant *Tabago* da La Punt chi avaiva cooperà pro l'incorporaziun. Dal 1825 ais il sainen gnü cumprà dal chantun insembel cul uter (altar) da ml. Clot *Carl* pella chapelletta previssa giò Vulpera chi ais alura gnüda fabrichada dal 1827/28. Tut giò dal clucher e portà giò Vulpera l'han Johann *Zischg* il vegl e Hans *Jörg König*, duos homens fermes e robusts. Aint il clucher d'eiran 5 plans. Els han fat quai fich simpel, tut giò il sain sül plan süsom, sfat quist e laschè giò sün tschel plan ed uschè inavant. Cur chi sajan passats tras *Sparsels* haja tuot gnü granda malavita, pustüt ils puobs chi avaivan pudü sunar a bainplaschair il sainen dal chastè. Ma cha l'algrezcha e'l dalet a Vulpera sajan alura stats ourdvard grands, cur ch'el haja clingià ümilmaing per la prüma jada sur la cuttüra. Tadlai sia vusch . . .

Tarasp, mardi 15 settember 1964

